



PAENITENTIARIA APOSTOLICA

Prot. N. 00354/2026-1336/25/I

DECRETUM

Hoc autem Iubilaeo Ordinario anni MMXXV nuper peracto, operibus Misericordiae spiritalibus et corporalibus peculiari ratione sacro, luminosam memorare iuvat Concilii Vaticani II doctrinam de christiana doloris significatione eiusque inter fratres condicione: “Cum caritatis et misericordiae opera praeclarissimum testimonium christianae vitae efferant, formatio apostolica ad haec quoque exercenda adducere debet, ut discant christifideles ab ipsa pueritia fratribus compati eiusque indigentibus generoso animo subvenire” (Decr. *Apostolicam actuositatem*, 31 c).

Annua Mundialis Infirmorum Diei celebratio, a Sancto Ioanne Paulo Pp. II in liturgica memoria Beatae Virginis Mariae Lapurdensis instituta, pastoribus fidelibusque efficacem praebet catechesim circa salvifici doloris significationem et magis movet omnes qui, quolibet titulo, dediti in servitium fratrum animo et corpore laborantium sunt. Nunc Leo Pp. XIV, Minister fidei ac laetitiae nostrae, occasione XXXIV Mundialis Infirmorum Diei nos hortatur ut amemus, fratris nostri dolorem uti misericors Samaritanus ferendo. Sub ipsius Diei finem, Eminentissimus Dominus Michaël Cardinalis Czerny, S.I., Praefectus Dicasterii pro Integra Humana Progressione fovenda, velut Missus Summi Pontificis Extraordinarius, in Chiclayensi Sanctuario, sub tit. Nostrae Dominae de Pace, die XI Februarii MMXXVI sollemni praesidebit celebrationi eucharisticae, cum sacramenti Unctionis infirmorum administratione.

Quo autem christifideles animo ad illum eventum melius disponantur, praefato Dicastero enixe rogante, haec Apostolica Paenitentia, cuius est omnia quae ad concessionem et usum Indulgentiarum spectant rite ordinare, fideliumque animos ad earum obtinendarum pium desiderium recte concipiendum et fovendum excitare, benigne dilargiri annuit :

A. *Indulgentiam plenariam*, suetis sub condicionibus (sacramentali Confessione, eucharistica Communionem et oratione ad mentem Summi Pontificis), christifidelibus vere paenitentibus et contritis die XI Februarii MMXXVI obtinendam, quam animabus fidelium defunctorum per modum suffragii applicare poterunt, si sacris devote interfuerint ritibus in Chiclayensi Sanctuario, sub tit. Nostrae Dominae de Pace, ad Mundialis Infirmorum Diei fines a Deo impetrandos peractis et Orationem Dominicam et Symbolum Fidei recitaverint, addita pia aliqua Mariana Invocatione.

Christifideles vero qui, vel in publicis nosocomiis vel in quavis privata domo, ut Bonus Samaritanus aegrotantium misericordiae sollicitudine curam agunt et huiusmodi muneris explendi causa supradictis sacris ritibus interesse nequeunt, eodem die pariter *plenariae Indulgentiae donum* consequentur, si illud caritatis servitium, veluti ipsi Christo Domino persolutum (cf. *Mt* 25, 40), generose saltem per aliquot horas expleverint et Orationem Dominicam, Symbolum Fidei et piam aliquam Marianam Invocationem recitaverint, eadem animi dispositione habita et proposito concepto, cum primum poterunt, perficiendi condiciones ad Indulgentiam plenariam obtinendam requisitas.

Christifideles denique qui infirmitate, senectute vel alia huiusmodi causa, impediuntur quominus ritibus ut supra celebrandis interesse possint, Indulgentiam plenariam consequentur si, elongato animo a quocumque peccato et concepto proposito suetas condiciones, cum primum eis possibile erit adimplendi, illo die sese in spiritu dictis functionibus univerint, praesertim dum liturgicae celebrationes ope communicationis instrumentorum propagabuntur, pro omnibus infirmis pie oraverint et sui corporis infirmitates animique aegritudines Deo per Deiparam Virginem Mariam, "Salutem infirmorum" invocata, obtulerint.

B. *Indulgentiam partialem* omnibus christifidelibus toties, corde saltem contrito, in adiutorium infirmorum implorandis devotas Misericordiae Deo preces die supra signato fuderint.

Quo igitur accessus, ad divinam veniam per Ecclesiae claves consequendam, facilius pro pastoralis caritate evadat, haec Paenitentiarum enixe rogat ut parochi, valetudinariarum cappellani una cum presbyteris legitime adprobatis, generoso animo celebrationi Paenitentiae sese praebeant ac Sanctam Communionem infirmis ministrent.

Praesenti pro hac vice valituro. Non obstantibus in contrarium facientibus quibuscumque.

Datum Romae, ex aedibus Paenitentiarum Apostolicae, die XI mensis Februarii, in liturgica memoria Beatae Virginis Mariae Lapurdensis, anno Reparatae Salutis MMXXVI.

Angelus card. de Donatis
Paenitentiarum Major

+ Christophorus Iosephus Nykiel
Episcopus tit. Velicensis, Refectus